

**ZAKON**  
**O VLADI FEDERACIJE BOSNE I HERCEGOVINE\***  
*(neslužbeni prečišćeni tekst)*

**I - OPĆE ODREDBE**

**Član 1.**

Vlada Federacije Bosne i Hercegovine (u daljem tekstu: Vlada Federacije) je izvršni organ Federacije Bosne i Hercegovine (u daljem tekstu: Federacija), koja vrši izvršnu vlast Federacije, ako određene izvršne kompetencije nisu Ustavom Federacije predviđene za Predsjednika Federacije, odnosno jednog od Potpredsjednika Federacije.

**Član 2.**

Premijer/Predsjednik Vlade Federacije i njegovi zamjenici, ministri i Vlada Federacije u cjelini za svoj rad odgovorni su Parlamentu Federacije, Predsjedniku i Potpredsjednicima Federacije. Ministri su odgovorni i Premijeru/Predsjedniku Vlade Federacije, u skladu sa Ustavom Federacije.

**Član 3.**

Vlada Federacije zastupa Federaciju kao pravno lice, ako Ustavom Federacije i zakonom nije drugačije određeno.

Vlada Federacije upravlja imovinom u vlasništvu Federacije, ako zakonom nije drugačije određeno.

**Član 4.**

Vlada Federacije uređuje svoj rad, unutrašnju organizaciju, kao i djelokrug i ovlaštenja službi koje obrazuje.

**Član 5.**

Sjedište Vlade Federacije je u Sarajevu.

Premijer/Predsjednik Vlade Federacije i zamjenici Premijera/Predsjednika Vlade Federacije imaju jedan zajednički područni ured u Mostaru.

**II - SASTAV VLADE**

**Član 6.**

Vladu čine: Premijer/Predsjednik Vlade Federacije koji ima dva zamjenika, iz različitih konstitutivnih naroda koji se biraju iz reda ministara i ministri.

Vlada Federacije se sastoji od osam ministara iz reda bošnjačkog, pet ministara iz reda hrvatskog i tri ministra iz reda srpskog naroda. Jednog ministra iz

---

\* Zakon je objavljen u "Službenim novinama Federacije BiH", br. 1/94, 8/95, 58/02, 19/03, 2/06 i 8/06. Radi preglednosti teksta Zakona, a u cilju olakšavanja kandidatima pripremanja Ispita općeg znanja priređivači se prečistili tekst zakona.

reda ostalih može imenovati Premijer/Predsjednik Vlade iz kvote najbrojnijeg konstitutivnog naroda.

Nakon potpune provedbe Aneksa 7. Općeg okvirnog sporazuma za mir u Bosni i Hercegovini najmanje 15% članova Vlade Federacije mora biti iz jednog konstitutivnog naroda. Najmanje 35% članova Vlade mora biti iz dva konstitutivna naroda. Jedan član Vlade mora biti iz reda ostalih.

#### **Član 6a.**

Predsjednik Federacije uz saglasnost oba Potpredsjednika Federacije, imenuje Vladu Federacije nakon konsultacija sa Premijerom/Predsjednikom Vlade Federacije ili sa kandidatom za tu funkciju.

Vlada Federacije je izabrana nakon što je njeno imenovanje potvrdio većinom glasova Predstavnički dom Parlamenta Federacije.

Svako upražnjeno mjesto popunjava se istim postupkom.

Ukoliko Predstavnički dom ne potvrdi imenovanje Vlade Federacije, Predsjednik Federacije u saglasnosti sa Potpredsjednicima Federacije, a uz konsultaciju sa Premijerom ili kandidatom za tu funkciju, ponovo će postupiti u skladu sa stavom 1. ovog člana.

#### **Član 7.**

Premijer/Predsjednik Vlade Federacije i njegovi zamjenici, kao i ministri, nakon potvrđivanja imenovanja u Predstavničkom domu Parlamenta Federacije daju svečanu izjavu pred predsjedavajućim Predstavničkog doma Parlamenta Federacije.

#### **Član 8.**

Vlada Federacije imenuje i razrješava sekretara Vlade Federacije.

Sekretar Vlade Federacije odgovara za svoj rad Vladi Federacije, Premijeru/Predsjedniku Vlade Federacije i zamjenicima Premijera/Predsjednika Vlade Federacije.

### **III - PRAVA I DUŽNOSTI PREMIJERA, ZAMJENIKA PREMIJERA I ČLANOVA VLADE FEDERACIJE**

#### **Član 9.**

Premijer je predsjednik Vlade i rukovodi radom Vlade i odgovoran je za njen rad, osigurava jedinstvo u izvršavanju poslova iz djelokruga Vlade, ostvaruje saradnju sa drugim organima Federacije i organima kantona, sa drugim državnim tijelima, kao i sa drugim organima i organizacijama i usmjerava djelovanje Vlade kao cjeline i članova Vlade pojedinačno, te vrši i druge poslove utvrđene Ustavom Federacije.

Premijer potpisuje akte Vlade Federacije.

#### **Član 10.**

Zamjenici Premijera/Predsjednika Vlade Federacije pomažu Premijeru/Predsjedniku Vlade Federacije u obavljanju njegovih poslova.

U slučaju odsutnosti Premijera/Predsjednika Vlade Federacije ili u drugim slučajevima kada Premijer/Predsjednik Vlade Federacije nije u mogućnosti da obavlja dužnost zamjenjuje ga jedan od zamjenika Premijera/Predsjednika Vlade Federacije kojeg on odredi.

U slučaju kada Premijer/Predsjednik Vlade Federacije nije u mogućnosti da odredi koji od zamjenika Premijera/Predsjednika Vlade Federacije će ga zamjenjivati, kao i u slučaju upražnjenja mjesta Premijera/Predsjednika Vlade Federacije, dok novi Premijer/Predsjednik Vlade Federacije ne preuzme dužnost, Predsjednik Federacije, uz saglasnost oba Potpredsjednika Federacije, odredit će jednog od dva zamjenika Premijera/Predsjednika Vlade Federacije koji će obavljati dužnost Premijera.

Premijer/Predsjednik Vlade Federacije, u okviru svojih ovlaštenja, može pojedina svoja ovlaštenja prenijeti na zamjenike Premijera/Predsjednika Vlade Federacije.

#### **Član 11.**

Članovi Vlade mogu pokrenuti inicijativu za donošenje zakona i drugih propisa, predložiti razmatranje i pretresanje pojedinih pitanja iz nadležnosti Vlade kao i predložiti utvrđivanje stavova Vlade, te imaju i druga prava i dužnosti utvrđena Ustavom.

### **IV - NAČIN RADA VLADE**

#### **Član 12.**

Vlada Federacije radi na sjednici.

Vlada Federacije može odlučivati ako sjednici prisustvuje više od polovice članova Vlade.

Vlada Federacije odluke donosi većinom glasova prisutnih članova, ako Ustavom Federacije nije drugačije određeno.

#### **Član 13. *Brisan***

#### **Član 14.**

Za davanje prijedloga i mišljenja o pitanjima iz svoje nadležnosti, Vlada Federacije može osnivati stalna i povremena radna tijela (savjete, urede, komitete, odbore, komisije i dr.).

Sastav i nadležnost radnih tijela iz stava 1. ovog člana uređuje se Poslovníkom Vlade ili aktom o osnivanju.

#### **Član 15.**

Za donošenje rješenja u upravnom postupku i odlučivanje o drugim pojedinim pitanjima iz nadležnosti Vlade, Vlada Federacije može osnovati jednu ili više komisija čije članove imenuje iz redova članova Vlade.

#### **Član 16.**

Vlada Federacije donijet će Poslovnik o svome radu u roku od 30 dana od dana svoga konstituiranja, koji će pored ostalog urediti postupak i način zakazivanja sjednica Vlade Federacije, određivanje mjesta održavanja sjednica, postupak i formu prethodnog razmatranja materijala, utvrđivanje prijedloga i zaključaka, način ravnopravne upotrebe jezika i pisma konstitutivnih naroda u pripremi i izradi pisanih materijala, način izvršenja zaključaka, prenošenje ovlaštenja i zaduženja i druga poslovnička pitanja.

Pojedina pitanja iz stava 1. ovog člana, ukoliko nisu uređena Poslovnikom Vlade Federacije, uređuju se zaključkom Vlade Federacije.

#### **Član 17.**

Vlada Federacije osigurava javnost svog rada.

### **V - AKTI VLADE**

#### **Član 18.**

Vlada Federacije, u ostvarivanju svojih ovlaštenja utvrđenim Ustavom Federacije, donosi uredbe sa zakonskom snagom, uredbe, odluke, rješenja i zaključke.

Vlada Federacije donosi uredbe sa zakonskom snagom u skladu sa Ustavom Federacije.

#### **Član 19.**

Uredbom se uređuju najvažnija pitanja iz nadležnosti Vlade Federacije, bliže uređuju odnosi za sprovođenje zakona, osnivaju stručne i druge službe Vlade i utvrđuju načela za unutrašnje ustrojstvo federalnih organa državne uprave.

Odlukom se uređuju pojedina pitanja ili propisuju mjere Vlade, daje saglasnost ili potvrđuju akti drugih organa ili organizacija, te odlučuje o drugim pitanjima o kojima se ne odlučuje uredbom.

Rješenjem se odlučuje o imenovanjima i razrješenjima, kao i o drugim pojedinačnim pitanjima iz nadležnosti Vlade.

Zaključkom se utvrđuju stavovi o pitanjima od značaja za provođenje utvrđene politike, uređuju unutrašnji odnosi u Vladi i određuju zadaci federalnim organima državne uprave i službama Vlade.

#### **Član 20.**

Uredbe sa zakonskom snagom, uredbe i odluke objavljuju se u «Službenim novinama Federacije Bosne i Hercegovine», a ostali akti Vlade, ako je to u njima navedeno.

### **VI - STRUČNE I DRUGE SLUŽBE VLADE**

#### **Član 21.**

Za obavljanje određenih stručnih i drugih poslova za svoje potrebe, Vlada obrazuje Stručnu službu Vlade, Ured za zakonodavstvo i druge samostalne stručne

službe, biroe i sl. Za vršenje određenih poslova za potrebe federalnih ministarstava, drugih tijela federalne uprave i drugih državnih tijela, Vlada može obrazovati zajedničke službe. Aktom o obrazovanju službe iz st. 1. i 2. ovog članka, utvrđuje se njen djelokrug, položaj i odgovornost funkcionera koji rukovodi tom službom, a može se ako priroda zadatka službe to zahtjeva, odrediti da određena služba ima svojstvo pravne osobe.

#### **Član 22.**

Sekretar Vlade usklađuje rad svih stručnih službi u obavljanju poslova za potrebe Vlade i odgovoran je za njihov rad.

### **VII - PRIJELAZNE I ZAVRŠNE ODREDBE**

#### **Član 23. *brisan***

#### **Član 24.**

Ovaj zakon stupa na snagu danom objavljivanja u «Službenim novinama Federacije BiH».